



spiritibus, quos terrâ suâ anathymias cum opprimit, sequuntur sopor, corporis gravitas, &c. cum petimit, syncope, pulsus languor, &c. cum in motus incongruentes cogit, delirium, convulsio, &c. Nec est quod credatur putredo extremum in rerum ignoratione perfugium. Circa illius essentiam qui tantâ contentione certant, sicut alibi passim rebus consentiunt, verbis discrepant. Putredinem febris malignæ parentem accersit quid acris acidius ve sanguini admixtum: aciditas nimia colligit partes sanguinis imprimis fibrosas; eas collectæ alias è sinu suo expriment disjiciuntque ut nullis consocientur nexibus, unde putredo. Interea, quæ coëunt partes in minimos arteriarum tubulos agrè protrusæ, in iisdem hærent, intricantur; aliarum accessu fortiores ignescunt, nî cohesionis vincula citò disrumpantur, simili ferè modo ac fenum calidius putret, incenditur. Acris teneras sanguinis fibras pungunt, penetrant, divellunt, secant, contextum abrumpunt, verbo dicam, sanguinem dissolvant, unde sanguis putrescens. Quid enim putredo nisi dissolutio sanguinis tanta, ut fibrosa pars malè cohereat, serosa huc illuc diffiliat; dissolutus sanguis hinc inde rapitur impotentiùs, implicatur viscerum vasorumque foris quos obstruit. Dari ejusmodi fermenta morbosâ non repugnat, nec si quid sensus fugit, id non esse putandum est. Spirituum doctrinâ nihil obscurius, ideo non exploduntur ex physicis rebus præcipua hæc naturæ instrumenta, Medicinæ fundamenta. Idem esto judicium de corporibus mole minimis, vi maximis, quibus Malignæ febris origo tribuitur. Hæc suas exerunt vires, citius, serius: prout sanguinis quem afficiunt, major minor ve fermentatio: utrique prospicit, qui nimiam compescit, imminutam accelerat.

### III.

**FEBREM** malignam cum periculosâ, imò & lethali qui confundit, abutitur nomine. Putrida, non-fecus ac maligna, quatenus acutè vehementibus stipantur symptomatis, sed (quod perversitatem probat) hæc insolitis, putrida non congruis; illa solitis, sibi consonis. Calor deurens, cum siti magnâ, asperitate linguæ, pertinacibus vigiliis, causum arguit vulgarem bene moratum: his adjuncta syncope, sopor, convulsio, insolentem malè moratum: noscitur quippe malignitas morbi ex syndrome symptomatum, quibus cum ejus indole non convenit, ex concursione effectorum quæ non concinunt causis; hinc suspitioni locus est, cum adsunt febris mollior, infania tumultuosior, calor mitis, inmodica sitis, linguæ scabrities, pulsus mollicies. Febrî malignæ nulla fides. hinc metu mortis terret non fucata feritas, illinc spe salutis læstat ementita imbecillitas: utraque quàm fallax! quot malefida benignitas è medio sustulit: quot terrificæ immanitas superstites reliquit? in acutis omnibus præfagia non omnino certâ, in malignis prorsus incerta, id cum alia multa suadent, maximè fluor alui, alijs citra coctionem salutaris, alijs cum coctione exitiosus, prosperum quibusdam sanguinis stillicidium, Filisei, Epamenonis, Sileni interitu infime Hippocrati, eodem autore, nemini non funestum, frequens è somno incrementum mali, cephalalgia, delirium, mors nonnumquam opprimens incautos, mentis sanos, pulsus æqualis, urinæ laudabilis fiduciam ferens. Sic peritissimis imponit affectus ille, à consimilium forte degener, alienus, cujus multiplex facies: sæpe formam induit intermittentis, sæpius continuæ, utriusque non rarò particeps, neutrûs adstringitur legibus. Signum illius constans, perpetuum, frustra quæras, nisi rationem habeat signi pathognomonici, nulla in signis servata ratio. <sup>ad præcipuum</sup> est morbus, non propterea <sup>debet</sup> sit Medicus: non ideo nova sit Medicina, quia febris est nova. Sed vide cui sit proxima; utere præsidii quæ vicino malo sæpius succurrerint. Hæc triplices sunt ordinis; vacantia, cardiaca, alterantia. Cardiaca publici sunt saporis, parçè tamen adhibenda, parciùs quò insignior sanguinis spiri-

trunque incandescencia; si deflectitur ab hac methodo, sive ad ostentationem artis, sive adulatione artificis, peccatur graviter; hæc etenim assumpta largius, ut blandimenta sunt fabricanti, sic irritamenta febri. Cur iis nimium indulges, solis confidis, quasi desint alia curandi instrumenta? horum ætate nostrâ tanta est ubertas, ut deligendi cura faciat te ancipitem, cave ne inopem, turpis Medico penuria remediorum, utilis ægro defectus meliorum. Hæc inter meretur palmam venæ sectio, quæ ita moderatur cursum sanguinis, ut rapidiori frænum injiciat, tardiori stimulum addat.

#### I V.

**M**ALIGNA febris ut ut complicata negotium non faceret tibi, dum memineris esse te discipulum, ministrum naturæ, cui obtemperare munus est medicis, salus ægrotantis. Attende quâ viâ sese expediat, eandem, si sapias, insiste: penes sanguinem culpa, vide quid agat, quid pariatur sanguis, cum ingravescit aut mitescit affectus; cum interit aut convalescit ægrotus. Sanguis stillans è naribus minatur perniciem, ubertim profluens præcavit phlebitidem, effluxu prohibitus portendit insaniam. Quid plura? convelluntur, præfocantur quibus hæmorrhagia perpetram sistitur, ex his quid conjicias? id unum quod monet Medicorum Antistes, *detrahendum sanguinem, si acutus fuerit morbus, qui ægrotant fuerint florenti ætate, & virium robore valuerint, dum adhuc utrobique qui affligunt, tum spiritus, tum humores* quid aliud indicant corporis lassitudo, segnities, propensio ad somnum? quid docet lumbis, pectori, dorso affixus, reliquo corpore mobilis, errabundus? quid oculorum splendor delirii prænuncius? quid tussis, anxietas, sitis, vigilia, loquacitas? quid papulæ præservidi sanguinis indices? his contraindicator venæ sectionem; quod erumpentes succos intus revocet, sententia est vulgi insipientis, nescientis motum sanguinis, naturæ, cujus est imitator, adiutor, qui venam tundit etiam conspectis in cute maculis, quid porro in Malignis febribus sanguinis missionem non suadet? dissuadet hanc sola virium jactura, suadet ipsa febris, qualiscunque sit sanguis illam committens, celerior, segnior, rarior, densior, tenuior, crassior. Sanguinis turbas sedari *non sufficit* probatione non indiget, eadem arte pigrum extimulari quis non videt? à sanguine concrescente inflammatio interna, qualis in Phlegmone hepatis, à sanguine exestuante inflammatio externa, qualis in Erysipelate cutis. Cor sanguinem pellit valentius in causo, pellit debilius in timore subitio. In hoc vix sentitur pulsus, in illo percipitur validus: in his omnibus quis nescit quanta ex sanguinis profusione utilitas? magno sanè argumento sanguinem venâ sectâ tardari, citari; ferri, intus foras; foris intrò, pro exigentiâ, quid ni ergo mittatur in omni febre malignâ, sive acutâ, sive molli, cum par sit utrobique sanguinis textura, motio. Scilicet quæ principis remedii laus est non minima, febris subtrahit formam, ministrat incitamenta. Hæc extranea ne credideris, sunt ipsi sanguini coarctata, insita; sunt partes ejus tenuissimæ, spirituosæ, quas crassioribus irretitas in libertatem vindicat missus sanguis: detractâ si quidem illius portione, quæ reliqua est liberius spatium nacta statim se se explicat, rarefacta admittit circumfusum aërem: ejus accessione sunt Spiritus vividiores quorum ope inducitur fermentatio, sæpe molesta, semper necessaria, non cessatura, si natura victrix, donec febrilis ætus deservuerit, expulsa fuerit febrilis materies.

#### V.

**Q**UALIS CUMQUE ergo sit febris maligna, dum consent vires, venam secâ, nec te à proposito deterreant recentiorum hypothesès: si bene intelligantur, veterem Medicinam confirmant, non immutant. Enim verò nascitur febris maligna, vel à coagulatione sanguinis, vel ab acriori sale, ut volunt, quid inde ad

4

versus nostram thesim? quid contra quod eam non stabiliat? si Neotericis hæc in parte accedimus, omnem paginam implent temperantia, dissolventia: quid autem magis temperat, quid dissolvit tutius sanguinem quam venæ sectio? depletâ venâ, depletur arteria: quantum enim minuitur renixus venosi sanguinis, tantum augeatur vis arteriosi, angetur ex æquo utriusque velocitas: auctâ velocitate sanguinis, præcedens à succedente recedit promptius, minus à tergo pressus, minus in se nititur, reflectitur, minus atteritur, minorem attritionem sequitur imminutio caloris, optata refrigeratio, cessat perturbatus, concitator, peregrinus febris calor, præpeditur, vel tollitur omnis concretio, vasorum obstructio: sanguis enim infarctus minutionibus arteriis, earum elateri vim fecit, quam potuit maximam, tantam, ut resiliere nequeat, resilit exonerato vase; resilientibus fibris redit quæ perierat systole, systolem proxime sequitur diastole, diastolem minor ab incumbente membranâ sanguinis pressio, minorem pressionem desiderata rarefactio, rarefactionem mutatio situs, ordinis, motus partium sanguinis, mutationem illam nova mixtio, ab arteriis in venas naturalis commearus. Hæc omnia quæ ex venæ sectione commoda, aëris sanguinem ventilantis sunt beneficia; nec enim ventilationis nomen inane est. Aëris aditu servatur à conflagratione fenum putre, incendium minuitur, pariter & sanguis, aër si quidem partes sulphureas agglomerari ceptas, à coalitu liberat aut tuetur. Sanguis aëris afflatu factus fluidior, in objecta repagula ruit vehementius, repetitis conatibus viam sibi aperit, obstruentem materiam indefinenter alluens particulas aliquot identidem abradit, donec ita redituque frequenti omnes secum abripiat, moli sanguineæ reddat; quæ cum ita sint, ea medendi ratio putetur optima & physicæ magis consentiens, quæ parvifactâ malignitate, quamdiu vires non pessundat, febrem malignam perinde ac putridam oppugnat iis omnibus, quæ tutò sanguinem refrigerant, comminuunt, demulcent: quem scopum uter attingit, qui utitur lactis sero? an qui iusculis viperinis? qui putridum sanguinem quantum opus est vacuat; an qui venâ ter quaterve pertusâ, phlebotomiâ supersedet citius, quod non minuatur febris, quæ ab ipso ortu magna: crescat, quæ parva, quasi non sit è ratione febris, hanc intendi, quia ignis sopitus: illam subito non remitti, quia late sparsum. Cur itaque subsistis, pergere cum debeas? Hyems nuperrima ferax fuit malignis febribus, variis curatæ sunt modis: quibusdam fuisse cardiaca instar omnis armaturæ, aliis visum est parcere cardiacis, in partem operis maximam vocare scalpellum. Nocuit prior praxis, profuit posterior, quibus potissimum fuit profusus sanguis, manu, pro virium constantiâ, liberali.

### *Ergo malignis febribus venæ sectio.*

### Domini Doctores disputaturi.

*M. Claudius Quiquebœuf.  
M. Michael Joannes Garbe.*

*M. Bertinus Simon Dieuxirvoye.*

*M. Joannes Bordin.  
M. Guido Erasmus Emmerez,  
Scholarum Professor.*

*M. Michael de Hodencq.*

*M. Nicolaus Morin.  
M. Claudius Quartier.*

*M. Michael de la Vigne.*

Proponebat Lutetiæ JOANNES-BAPTISTA GABRIEL FRESSANT,  
Parisinus Baccalaureus Medicus. A. R. S. H. 1694.

Apud Franciscum Muguet, Regis & Facultatis Medicinæ Typographum.